

“Runghraix” dwg aen coh mbanj Bingzgoj Yienh Majdouz Cin ndeu, miz roek aen mbanj swhyienz, gyoengq coh mbanj faenbied dwg Ndawngaenz、Bouxnda、Raixgwnz、Raixlaj、Runghbang caeuq Runghroed. Aen coh “Runghraix” neix couhdwg “Runghbang”、 “Runghroed” caeuq “Raixgwnz”、 “Raixlaj” seiq aen mbanj neix aeu cih “rungh” caeuq cih “raix” daeuj habbaenz. Hoeng, gij coh “Ndawngaenz”、 “Bouxnda”、 “Raixgwnz”、 “Raixlaj”、 “Runghbang” caeuq “Runghroed” vihmaz heuhguh yienghneix ne? Mbouj miz geijlai vunz rox aen laizyouz neix.

Cienznaeuz mizmbangj bing byoem raez dawz ngaenz, rox budui youq baihnaj hoenx baih deng mued caez lo, couh doxyaeng dawz gij ngaenz neix haeuj rungh bae yo. Mizmbangj ngaenz dawz haeuj ndaw gamj bae, aen gamj he cang rim le couh aeu ndaek rin ngamq hab aen bak gamj hung ndeu dimz haeujbae. Mizmbangj ngaenz couh moek roengz laj namh bae, aeu ndaek rin youh benj youh hung he daenz youq baihgwnz caiq daem namh. Caemhcai q cuengq vah okdaeuj naeuz gizneix heuhguh gumhngaenz, vanzlij baij vunz hen ngaenz dem. Gyoengq vunz neix naeuz swdgeij dwg “Bouxhenngaenz”. Gyoengq vunz rog hixnaengz mbouj aeu cih “hen”, couh heuh gyoengqde guh “Bouxngaenz”. Bi dem bi gvaqbae lo, gyoengq vunz neix yied sanj yied lai, laebbaenz aen mbanj he, gyoengqvunz couh heuh aen mbanj

Gij Coh Gak Mbanj Runghraix Baenzlawz Daeuj 龙来村各个屯名怎么来

□ Vangz Gozgvanh / 黄国观

neix guh “Bouxngaenz”. Doeklaeng, gyoengqde roxnyinh “Bouxngaenz” mbouj beij “Ndaejngaenz” ndei. Hoeng, “Ndaejngaenz” youh daiq mingzyienj lai, ndigah couh gaj aen coh mbanj baenz “Ndawngaenz” lo.

Doeklaeng, miz boux vunzhek he laeglemx daengz Ndawngaenz daeuj cam gij ngaenz youq gizlawz. Gyoengqvunz Ndawngaenz vix baihdoengbaek naeuz: “Bouxnda gaenq aeu hanz ram gij ngaenz gvaq gemh bae lo.” Bouxhek neix dingq le doq gvaq gemh bae ra bouxnda. De cam bouxnda, bouxnda couh vix baihbaek naeuz: “Miz vunz gaenq rap daengz gwnz haenx bae raix lo”. Bouxhek neix dingq le ndawsim gag naemj: Gyoengq vunz neix mbouj rox ngaenz dijbauj, dawz bae raix caez, gou gaenjgip bae aeu cij ndaej. Yienghneix de couh buetfww dwk bae daengz giz bouxnda vix. Youh cam bouxraix, bouxraix vix baihdoeng naeuz: “Raix roengz laj haenx bae lo”. Bouxhek neix byaij daengz baihdoeng, youq gwnz yawj roengz laj bae hix mbouj raen gij

ngaenz saek di, roxnyinh swdgeij deng yaeuh, cijndei dauqbae lo. Naeuz gij ngaenz neix youq gizhaenx yo roxnaeuz deng bae raix, cungj dwg yaeuh bouxhek haenx. Gizsaed gij ngaenz neix gaxgonq youh deng dawz daengz aen gamj hung ndaw bya baihsaebaek he bae yo lo. Bouxnda caeuq bouxraix doeklaeng aeu bawx, miz lwg miz lan, menhmenh vunz lai lo, hix laebbaenz song aen mbanj, gij coh mbanj faenbied dwg Bouxnda caeuq Bouxraix. Doeklaeng Bouxraix caiq baen baenz song baih—— Bouxraix baihgwnz caeuq Bouxraix baihlaj. Ndigah Bouxraix aen mbanj he couh bienqbaenz song aen mbanj——Raixgwnz caeuq Raixlaj.

Aenvih mwhhaenx cungj senj gyoengqvunz miz rengz ram ngaenz bae yo, ndigah vunz cungj heuh gyoengqde guh “Bouxrengz”. Caemhcai q dawz ngaenz bae yo ngoenzde, lau miz vunz gaenlaeng bae caeg ngaenz, couh ce geij boux vunz youq buenq roen hen. Aenvih mbanj vunz neix dwg bang dawz gij ngaenz bae yo,

ndigah vunz cungj heuh gyoengqde guh “Bouxbang”. Doeklaeng hix cungj laebbaenz mbanj lo, vunz couh heuh gij mbanj guh Bouxrengz caeuq Bouxbang.

Gangj daeuj geizheih, miz hwnz he, song bouxdaeuz Bouxrengz caeuq Bouxbang fangzhwnz cungj doxdoengz caez: Miz duz lungz he ndongqsaksak, youq gwnz mbwn doek roengzdaeuj, aen gyauej de cingqngamj goemq youq gwnz bya yo ngaenz, aen nyauj swix baihlaeng doek daengz henz Bouxbang. Ngoenzlaeng, song bouxdaeuz neix raennaj couh gangj daengz gienh saeh neix, roxnyinh bouxmien mizeiq soengq gyoengqde gij coh mbanj. Ndihgah couh doxyaeng gaj gij coh mbanj baenz Lungzrengz caeuq Lungzbang. Gyoengqvunz rog raen song aen mbanj neix cungj youq ndaw rungh, boux riuz boux couh heuhguh baenz “Runghrengz” caeuq “Runghbang”.

Gvaq mbouj geijlai nanz, youh aenvih youq henz bya yo ngaenz miz goengq bya he hwnj faexroed gig lai, goengq bya neix heuhguh “Byaroed”, ndigah bouxdaeuz Runghrengz couh gaj aen coh mbanj baenz “Runghroed”.

Yienghneix couhdwg gij coh roek aen mbanj Runghraix baenzlawz daeuj lo. Seizneix gij coh mbanj youz haidaeuz dwg Bouxngaen、Bouxnda、Bouxraix、Bouxbang caeuq Bouxrengz bienqbaenz Ndawngaenz、Bouxnda、Raixgwnz、Raixlaj、Runghbang caeuq Runghroed.

·gojsaeh iq·

Aen Bied Cang Rim Ndaekrin 装满石头的篓子

Boux vunz he gamjdaengz swngghoz gig naekcaem, couh bae ra bouxlaux ndeu, muengh bouxlaux haenx ndaej bang de gajgez gij vwndiz neix.

Bouxlaux haenx mbouj gangj gijmaz, cijdwg hawj de aen bied he heuh de aemq, caemhcai q vix diuz roen sa he naeuz: “Mwngz byaij baez ndeu couh gip ndaek rin he cang haeuj aenbied bae, yawj miz gijmaz gamjgyoz.” Boux vunz haenx ciuq vah bouxlaux haenx gangj bae guh, bouxlaux haenx couh gig vaiq dwk byaij daengz byairoen bae caj boux vunz neix.

Gvaq ndaej yaep ndeu, boux vunz haenx byaij daengz byairoen lo, bouxlaux neix couh cam de miz gijmaz gamjgyoz.


Boux vunz haenx naeuz: “Gamjdaengz yied daeuj yied naek.”

“Aen neix couhdwg yenzyinh mwngz vihmaz gamjdaengz swngghoz yied daeuj yied naekcaem.” Bouxlaux neix laebdaeb naeuz: “Moix boux vunz daeuj daengz gwnzbiengz seiz, cungj aemq aen bied hoengqvai he, youq gwnz roen seiqvunz byaij yamq he, cungj aeu daj gwnzbiengz neix aeu yiengh doxgaiq ndeu cuengq haeuj ndaw aenbied bae, ndigah couh roxnyinh yied byaij yied baeg.”

Boux vunz haenx cam: “Miz gijmaz banhfap ndaej gemjmbaeu gij aemqnaek neix?”

Bouxlaux haenx dauqfanj cam de: “Yienghneix mwngz nyienh dawz gunghcoz、aicingz、gyahdingz roxnaeuz youjcingz yienghlawz okdaeuj ne?” Boux vunz haenx dingq le mbouj gangj coenz vah ndeu.

Bouxlaux haenx naeuz: “Gawqyienz cungj roxnyinh sijbae nanz, yienghneix couh mbouj yungh bae siengj gij aemqnaek haenx, wnggai bae siengj angq mwngz miz. Doxgaiq ndaw aenbied moix boux vunz mboujdan cijdwg cang aensiengj gwnzmbwn hawj raeuz, lij miz cwzyin caeuq yivu. Mwngz gamjdaengz naekcaem seiz, lauhei q mwngz wnggai angqing swdgeij mbouj dwg aemq aenbied wnq, aenvih aen bied bouxwnq aemq gojnwngz beij aen mwngz lij hung lai, hix naekcaem lai lo. Yienghneix bae siengj, mwngz mbouj wnggai angq lai?” Boux vunz haenx dingq le sawqmwh roxyiuj lo, gamjdaengz ndawsim de beij gaxgonq soeng lai dahraix.



Giuz bouxmien Fungsanh Yen

·goj iq·



Gaxgonq, miz boux vunz ndeu dawz aen guenq gig ndeiyawj he bae ganjlloh. De byaij yaep he, mbouj siujsim aen guenq de deng doek youq henz roen gwnz ndaek rin hung he, aen guenq haenx doq soiq liux caez. Gyoengqvunz youq gwnz roen yawj lo, cungj dingz roengzdaeuj yawj, nyinhnaeuz aen guenq haenx gig ndeiyawj, deng doek dek bae hojsik dahraix. Hoeng, boux vunz guenq deng dek neix lumjnaeuz mbouj miz gienh

saeh fatseng gvaq, gyauej de hix mbouj cienq daeujdauq, yawj hix mbouj yawj aen guenq de, lumjgaeuq yiengh haenx laebdaeb byaij roen ganjlloh.

Seizneix gyoengqvunz gwnz roen cungj gamjdaengz gig geizgvaiq, boux vunz neix vihmaz baenzneix mbouj dawzhaeujsim ne? Aen guenq haenx gig ndeiyawj, dek bae caen dwg sim’in. Vanzlij miz vunz ngeiz boux vunz aen guenq dek cingsaenz mbouj cingqciengz.

Doeklaeng, miz boux vunz he bae cam boux vunz neix vihmaz yienghneix guh?

Boux vunz neix dap: “Aen guenq haenx gaenq doek dek liux lo, gou yawj de lai mbat de hix mbouj rox fukdauq baenz yiengh gaxgonq caengz doek dek, yienghneix, gou vihmaz caiq sai seizgan bae louzlien de? Gou wnggai ganjgip bae ganjlloh cij deng.”